

Proclamaties

op'n groot'n goodmaakdag op 26 oktober 2012 bie "Koapman " in Till'gt.

Debie waar'n prominente delegaties oet Dènekaamp en Oatmöske.

Doel hiervan is um de tèg'nstelling'n en vijandelijkheid'n tuske de bèr plaats'n veur eens en veur altied oet de wearld te helpen.

De twee partij'n hebt veurof de intentie(dit betekent: will'n en d'r veur goan) oetsprök'n, um doar met meka oet te komm'n.

En dat is godzijdaank noa lang wikk'n en weeg'n(les hier: @'n en zoep'n) oeteendelijk wa lukt.

De strijdbiel wöd nig begraaf'n mear symbolisch ophang'n bie Koapman in't café.

De hele wearld mag hier een veurbeeld an nemm'n, want d'r is iellend genug op dizze aardkloot.

Hieronner zeej de proclamaties van de twee partijen, die allemaal werkt bie Heisterkamp Dranken.

Proclamatie van de Leu oet doarp Dènekaamp

Wie leu oet'n doarp "Dènekaamp" wilt het volg'nde oetsprekk'n en beloof'n an de leu oet "Oatmöske". Volgens oons mot het een moal ofloop'n wenn'n met aal dat gestiggel oawer en wear. Want begriep dit: "Te hoap biw grötter en better".

1. Wie leu oet Groot en Klèen Aogel, Dènekaamp, Tillgt, Lattrop, Brekkelkaamp, Nutter, Oald Oatmöske, Noard Deurning'n, 'n Ottershaag'n en 't Spring'ndal, zölt nig mear daal kiek'n op de leu oet Oatmöske. Ze zit ja toch boaf'n op berg. Wie bint noe geliek an meka en: "Te hoap biw grötter en better".
2. Wie zölt nig mear hardop zèg'n dat ne Siepel stinkt. Aj nen köttelpear lang loat ligg'n begint den ok wa te stink'n. Zo dat probleem is dan hiermet ok oet de wearld. Dus zegt wie met de waskeknip op'n nös: "Te hoap biw grötter en better".
3. Wie vindt 't wa goat dat de leu oet Oatmöske goat waandel'n op oons Springdal. De natuur heurt oons allemaal en ze woont d'r toch dichter bie. Debie koomp nog dat wie oet Dènekaamp ok wa könt waandel'n met'n hound op 't Singgraaf'n. Wie zegt dan ok met meka: "Te hoap biw grötter en better".
4. DOS tèg'n KOSC of aansum, gaf aai vol trammelant. Doar is noe gen geneuzel mer oawer want KOSC hef zich umhoog werkt en noe zit wie bie meka in de klas. De ofgunst en nijd is noe eendelijk viebie. Met meka kiek't wie vanof noe noa een paar mooie wedstried'n. En wie zingt langs de lien haand in haand: "Te hoap biw grötter en better".
5. Wie mènn'n altied dat de leu oet de stad altied samenschool'n in kliekjes van mear dan 2 persoon'n umdat ze het achter de elleboog'n hadd'n. Dat blik nig zo te wen, want ze waar'n gewoon te bleu um met anner volk in ketakt te komm'n. Vanof noe nemt wie ze bie de haand en hebt ze dat probleem ok nig mear. Zo köj meka ok help'n: "Te hoap biw grötter en better".
6. Wie zölt nooit mear round Poaske dènk'n, loat stoan hardop zegg'n, dat dee kearls in Oatmöske met potleur ant vèent bint. Ie könt ja ok nig zeen wat ze d'r allemaal onneran hebt, d'r kan wa 'n half vèrken onner. Wie holt doar noe oawer op want: "Te hoap biw grötter en better".
7. Wie vindt dat ze in Oatmöske en in Weersel ok wa een mooi gemeentehoes hebt had. Het is noe eenmaal loop'n zoas 't loop'n is. Mear het zit oons ok nig echt lekker. Binn'n paar jaor wöd dit akkefietje ok wear oplost en köw allemaal noa 't gemeentehoes in Tubbig. Dan hew de koppel nog wear grötter en zegt wie opnij: "Te hoap biw grötter en better".
8. Vanof noe zöw de leu oet Oatmöske met annere oog'n bekiek'n. Wie zölt werk maak'n van wat wie hier beloofd hebt. De grote verbroedering is noe een feit.

Proclamatie van de Leu oet stad Oatmöske

Wie leu oet 't stedke "Oatmöske" wilt het volg'nde oetsprekk'n en beloof'n an de leu oet "Dènekaamp". Wie hopt daw v'noamd hier de strijdbiel könt begraaf'n want wie mött toch met meka vedan. En begriep goat: "Te hoap biw grötter en better".

1. Wie leu oet 't stedke Oatmöske, van onner'n Toar'nt, Villapark, Stobb'nkaamp, Binn'nes, Nijstad, 'n Mös, Wiel'nhof, Brookhoses, Moerbekk'nkaamp, Cell'nkaamp, Grote Maten, Vinke en'n Kuperberg kiek't nig mear vanoet de heugte noar de leu oet Dènekaamp. Ze hebt zich wal á oarig umhoogwerk't en: "Te hoap biw grötter en better".
2. Wie zegt nig mear dat'n Kuperberg helemaal van oons is. He lig ok nog half in Dènekaamp. He is trouwens ok nig mear zo groot aw dacht hadd'n, want ze hebt 'm laatst met 't stroat'n nog nen half'n meter lèger maakt en de kleikoel gèet d'r ok nog of. Wie zegt dan ok: "Te hoap biw grötter en better".
3. Wie zölt nig mear met vol tamtam en gedoo bie de voetbalwedstried'n van DOS en KOSC goan kiek'n. Ze spölt noe ja allebeer eef'n goat. En debie, de beste club oet Dinkelland met de meeste internationale ervaring, reputatie en overwinningen is toch met ofstaand Aogel United. Dus woar proat wie oawer. Zaand d'r oawer en geluk veur DSC'12. Achter de goals roopt wie in koar: "Te hoap biw grötter en better".
4. Wie beweart vanof noe nig mear dat wie het meujste zwembad hebt. Wie zegt hierbie dat'n Dorper Esch ok hatstikke mooi is. D'r goat zöf's ok verhaal'n dat ze doar 'n hagelneij wedstriedbad wilt maak'n. Wie komt dan bie de weenterdag doar ok wa zwemm'n. En dan sputtert wie met meka: "Te hoap biw grötter en better".
5. Wie vönn'n de leu oet doarp aait apart volk tutdat wie d'r lest achterkwamm'n dat zee ok net as wie ok gewoon met 't bloote gat in de onnerbokse goat. Mear het gef allemaal nijs mear want wie holt noe van meka. En aj van meka holt köj ok veul mear: "Te hoap biw grötter en better".
6. Wie hadd'n d'r wa meujte met dat noa de fusie 'n burgemeester oet'n doarp kwam. Dat gef wie wa earlijk too. Mear dat is noe wa oawer, want in Tubbig hebt ze noe ok nen goei'n en oawer een paar joar koomp Dinkelland en Tubbig ja toch bie meka. Ok doar zegt ze noe a: "Te hoap biw grötter en better".
7. Wie zölt nooit mear oetkroam'n dat ze met Poaske in'n doarp met nen teerton loopt te slèpp'n, woar zovöl tear in zit daj doar met de stroat van de Dènekaamper kerk noa Koapman in Till'gt könt tearn. Vanof noe zöw hier nig mear oawer zeur'n, want wie zingt noe met meka: "Te hoap biw grötter en better".
8. Wie zölt noa dizzen oomd d'r alles an doon um dit allemaal woar te maak'n. Dan köw noe oawergoan um de strijdbiel hier in't café op te hang'n. Dan kan alman hier zeen dat hier geschiedenis is schreef'n.